



Broj: 05-02-1-3418-16/21
Sarajevo, 29. 5. 2023. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 30-05-2023			
Organizaciona jedinica	Klasifikaciona oznaka	Redni broj	Broj priloga
01,02-02-1-1031/23		1031/23	

PARLAMENTARNA SKUPŠTINA BIH
DOM NARODA

PREDMET: Prijedlog Zakona o slobodi pristupa informacijama na razini institucija Bosne i Hercegovine, dostavlja se

Veza: Vaš akt broj 01,02-02-1-1031/23 od 15. 5. 2023. godine

Poštovani,

u svezi vašeg akta, gornje oznake i datuma, u privitku dostavljamo Prijedlog zakona o slobodi pristupa informacijama na razini institucija Bosne i Hercegovine, na bosanskom, hrvatskom i srpskom jeziku, kao i elektroničku verziju navedenog.

Istovremeno dostavljamo i dopis Ministarstva pravde BiH broj 09-02-1-5474-4/21 od 18. 5. 2023. godine, u kojem je sadržan kratak osvrt na usklađivanje predmetnog Prijedloga zakona s mišljenjem Zakonodavno-pravnog sektora broj 03/07-01,02-02-1-1031/23 od 9. 5. 2023. godine.

S poštovanjem,

GENERALNI TAJNIK
VIJEĆA MINISTARA BiH
mr. Robert Vidović

Privitak: kao u tekstu.

Dostavljeno:

- naslovu;
- Ministarstvo pravde BiH;
- a/a.





Broj: 09-02-1-5474-4/21
Sarajevo, 18. 5. 2023. godine

BOSNA I HERCEGOVINA
VIJEĆE MINISTARA
Generalno tajništvo
SARAJEVO

BOSNA I HERCEGOVINA VIJEĆE MINISTARA SARAJEVO			
25-05-2023			
05	02-1	3418-14	Broj priloga

21

PREDMET: Prijedlog zakona o slobodi pristupa informacijama na razini institucija Bosne i Hercegovine, usuglašen sa Mišljenjem Zakonodavno-pravnog sektora Parlamentarne skupštine Bosne i Hercegovine; dostavlja se

Veza vaš akt broj: 05-07-1-3418-11/21 od 12.5.2023. godine

Vašim aktom, broj i datum veze, Ministarstvu pravde Bosne i Hercegovine je dostavljen je akt Zastupničkog doma Parlamentarne skupštine Bosne i Hercegovine, broj: 01-50-2-13-11/23 od 10.5.2023. godine u čijem prilogu se nalazi i Mišljenje Zakonodavno-pravnog sektora Parlamentarne skupštine Bosne i Hercegovine, broj: 03/7-01,02-02-1-1031/23 od 9.5.2023. godine.

Od Ministarstva pravde Bosne i Hercegovine se traži da postupi sukladno članku 105. stavak (6) Poslovnika Zastupničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20 i 53/22), odnosno da Prijedlog zakona uskladi sa Mišljenjem Zakonodavno-pravnog sektora Parlamentarne skupštine Bosne i Hercegovine, te isti dostavi Generalnom tajništvu Vijeća ministara Bosne i Hercegovine, radi upućivanja istog Zastupničkom domu Parlamentarne skupštine BiH.

Kako je vaš akt zaprimljen u Ministarstvu pravde Bosne i Hercegovine 15.5.2023. godine, u propisanom roku od sedam dana dostavljamo korigiran tekst Prijedloga zakona o slobodi pristupa informacijama na razini institucija Bosne i Hercegovine, uz napomenu da je isti usuglašen u cjelosti sa Mišljenjem Zakonodavno-pravnog sektora na način da je:

- Članak 4. u uvodnom dijelu definiran i sadrži odredbu o uporabi izraza u muškom i ženskom rodu, a stavci (1), (2) i (3) ovog članka koji sadrže načela su izdvojeni u glavni dio propisa i sadržani su u članku (6) Prijedloga zakona;
- Izvršena korekcija predmetnog teksta glede uporabe glagola u sadašnjem vremenu i aktivnom obliku;
- Sukladno članku 25. stavak (2) Jedninstvenih pravila za izradu pravnih propisa u institucijama Bosne i Hercegovine („Službeni glasnik BiH“, br. 11/05, 58/14, 60/14, 50/17, 70/17 i 10/21) DIO OSMI i DIO DEVETI Prijedloga zakona su podijeljeni na dva članka, tako da sadrže po dva članka i to: DIO OSMI- čl. 47. i 48., a DIO DEVETI- čl. 49. i 50.;
- Brisana je oznaka stavka (1) u članku 47. Prijedloga zakona;
- Pravilno su i prema redoslijedu navedene sve izmjene i dopune Zakona o upravnom postupku i
- U srpskoj jezičkoj varijanti je ćirilničnim pismom pravilno izvršeno označavanje točaka u čl. 14., 16., 19., 32., 34., 38., 39. 42., 43., 45. i 48.

Slijedom navedenog u prilogu akta dostavljamo Prijedlog zakona o slobodi pristupa informacijama na razini institucija Bosne i Hercegovine, u pisanoj i elektroničkoj formi, na jezicima i pismima koji su u uporabi u Bosni i Hercegovini.


Uz Prijedlog zakona dostavljamo Izvješće o održanim javnim konzultacijama, Izjavu o održanim javnim konzultacijama, Obrazac 1a- Prethodnu procjenu utjecaja propisa, kao i Mišljenja mjerodavnih institucija i to: Ureda za zakonodavstvo, broj: 03/4-02-1-628/21 od 23. 8. 2021. godine; Ministarstva financija i trezora Bosne i Hercegovine, broj: 05-02-1-5440-2/21 od 27. 7. 2021. godine; Direkcije za europske integracije, broj: 03/A-06-2-NH-1321-8/19 od 16. 8. 2021. godine, s Izjavom o usklađenosti, broj: 03-06-2-1321-7/19 i Agencije za zaštitu ličnih/osobnih podataka, broj: 03-1-02-1-699-2/21 od 12. 8. 2021. godine.

Napominjemo da je u Izjavi o održanim javnim konzultacijama broj: 09-02-1-5474/21 od 31.1.2022. godine, došlo do tehničke greške kod upisivanja datuma završetka javnih konzultacija, pa je umjesto 18.3. 2021. godina, upisano 18.3.2019. godine, mada se iz Izvješća o održanim javnim konzultacijama i datuma početka istih 16.2.2021. godine, nedvojbeno zaključuje da se radi o očiiglednoj tehničkoj grešci.

Ujedno ističemo da je Prijedlog zakona označen „P.Z.E.I“ iz kog razloga predlažemo da se isti razmatra po skraćenom zakonodavnom postupku, sukladno odredbama članka 134. stavak (1) Poslovnika zastupničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20 i 53/22) i članka 125. stavak (1) Poslovnika Doma naroda Parlamentarne skupštine Bosne i Hercegovine („Službeni glasnik BiH“, br.58/14, 88/15, 96/15 i 53/16).

Slijedom navedenog, molimo da dostavljeni materijal prosljedite Parlamentarnoj skupštini Bosne i Hercegovine.

S poštovanjem,



Prilog:
-kao u tekstu (x3)

Dostavljeno:
- naslovu,
- u spis.



Broj: 05-02-1-3418-17 /21
Sarajevo, 29. 5. 2023. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 30-05-2023			
Organizaciona jedinica	Klasifikaciona oznaka	Redni broj	Broj priloga
01, 02	02-1	1031/23	

PARLAMENTARNA SKUPŠTINA BIH
ZASTUPNIČKI DOM

PREDMET: Prijedlog Zakona o slobodi pristupa informacijama na razini institucija Bosne i Hercegovine, dostavlja se

Veza: Vaš akt broj 01-50-2-13-11/23 od 10. 5. 2023. godine

Poštovani,

u svezi vašeg akta, gornje oznake i datuma, u privitku dostavljamo Prijedlog zakona o slobodi pristupa informacijama na razini institucija Bosne i Hercegovine, na bosanskom, hrvatskom i srpskom jeziku, kao i elektroničku verziju navedenog.

Istovremeno dostavljamo i dopis Ministarstva pravde BiH broj 09-02-1-5474-5/21 od 19. 5. 2023. godine, u kojem je sadržan kratak osvrt na usklađivanje predmetnog Prijedloga zakona s mišljenjem Zakonodavno-pravnog sektora broj 03/07-01,02-02-1-1031/23 od 9. 5. 2023. godine.

S poštovanjem,



Privitak: kao u tekstu.

Dostavljeno:

- naslovu;
- Ministarstvo pravde BiH;
- a/a.





Broj: 09-02-1-5474-5/21
Sarajevo, 19. 5. 2023. godine

BOSNA I HERCEGOVINA
VIJEĆE MINISTARA
Generalno tajništvo
SARAJEVO



BOSNA I HERCEGOVINA
VIJEĆE MINISTARA
SARAJEVO

PRIMLJENO: 26-05-2023			
Organizacioni jedinica	Klasifikacioni oznaka	Redni broj	Broj priloga
05	02-1	3418-15	

PREDMET: Prijedlog zakona o slobodi pristupa informacijama na razini institucija Bosne i Hercegovine, usuglašen sa Mišljenjem Zakonodavno-pravnog sektora Parlamentarne skupštine Bosne i Hercegovine; dostavlja se

Veza vaš akt broj: 05-07-1-3418-13/21 od 15.5.2023. godine

Vašim aktom, broj i datum veze, Ministarstvu pravde Bosne i Hercegovine je dostavljen je akt Doma naroda Parlamentarne skupštine Bosne i Hercegovine, broj: 01-50-2-13-11/23 od 10.5.2023. godine u čijem prilogu se nalazi i Mišljenje Zakonodavno-pravnog sektora Parlamentarne skupštine Bosne i Hercegovine, broj: 03/7-01,02-02-1-1031/23 od 9.5.2023. godine.

Od Ministarstva pravde Bosne i Hercegovine se traži da postupi sukladno članku 96. stavak (6) Poslovnika Zastupničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20 i 53/22), odnosno da Prijedlog zakona uskladi sa Mišljenjem Zakonodavno-pravnog sektora Parlamentarne skupštine Bosne i Hercegovine, te isti dostavi Generalnom tajništvu Vijeća ministara Bosne i Hercegovine, radi upućivanja istog Domu naroda Parlamentarne skupštine BiH.

Kako je vaš akt zaprimljen u Ministarstvu pravde Bosne i Hercegovine 18.5.2023. godine, u propisanom roku od sedam dana dostavljamo korigiran tekst Prijedloga zakona o slobodi pristupa informacijama na razini institucija Bosne i Hercegovine, uz napomenu da je isti usuglašen u cjelosti sa Mišljenjem Zakonodavno-pravnog sektora na način da je:

- Članak 4. u uvodnom dijelu definiran i sadrži odredbu o uporabi izraza u muškom i ženskom rodu, a stavci (1), (2) i (3) ovog članka koji sadrže načela su izdvojeni u glavni dio propisa i sadržani su u članku (6) Prijedloga zakona;
- Izvršena korekcija predmetnog teksta glede uporabe glagola u sadašnjem vremenu i aktivnom obliku;
- Sukladno članku 25. stavak (2) Jedinstvenih pravila za izradu pravnih propisa u institucijama Bosne i Hercegovine („Službeni glasnik BiH“, br. 11/05, 58/14, 60/14, 50/17, 70/17 i 10/21) DIO OSMI i DIO DEVETI Prijedloga zakona su podijeljeni na dva članka, tako da sadrže po dva članka i to: DIO OSMI- čl. 47. i 48., a DIO DEVETI- čl. 49. i 50.;
- Brisana je oznaka stavka (1) u članku 47. Prijedloga zakona;
- Pravilno su i prema redoslijedu navedene sve izmjene i dopune Zakona o upravnom postupku i
- U srpskoj jezičkoj varijanti je ćirilničnim pismom pravilno izvršeno označavanje točaka u čl. 14., 16., 19., 32., 34., 38., 39. 42., 43., 45. i 48.

Slijedom navedenog u prilogu akta dostavljamo Prijedlog zakona o slobodi pristupa informacijama na razini institucija Bosne i Hercegovine, u pisanoj i elektroničkoj formi, na jezicima i pismima koji su u uporabi u Bosni i Hercegovini.


Uz Prijedlog zakona dostavljamo Izvješće o održanim javnim konzultacijama, Izjavu o održanim javnim konzultacijama, Obrazac la- Prethodnu procjenu utjecaja propisa, kao i Mišljenja mjerodavnih institucija i to: Ureda za zakonodavstvo, broj: 03/4-02-1-628/21 od 23. 8. 2021. godine; Ministarstva financija i trezora Bosne i Hercegovine, broj: 05-02-1-5440-2/21 od 27. 7. 2021. godine; Direkcije za europske integracije, broj: 03/A-06-2-NH-1321-8/19 od 16. 8. 2021. godine, s Izjavom o usklađenosti, broj: 03-06-2-1321-7/19 i Agencije za zaštitu ličnih/osobnih podataka, broj: 03-1-02-1-699-2/21 od 12. 8. 2021. godine.

Napominjemo da je u Izjavi o održanim javnim konzultacijama broj: 09-02-1-5474/21 od 31.1.2022. godine, došlo do tehničke greške kod upisivanja datuma završetka javnih konzultacija, pa je umjesto 18.3. 2021. godina, upisano 18.3.2019. godine, mada se iz Izvješća o održanim javnim konzultacijama i datuma početka istih 16.2.2021. godine, nedvojbeno zaključuje da se radi o očiglednoj tehničkoj grešci.

Ujedno ističemo da je Prijedlog zakona označen „P.Z.E.I“ iz kog razloga predlažemo da se isti razmatra po skraćenom zakonodavnom postupku, sukladno odredbama članka 134. stavak (1) Poslovnika Zastupničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20 i 53/22) i članka 25. stavak (1) Poslovnika Doma naroda Parlamentarne skupštine Bosne i Hercegovine („Službeni glasnik BiH“, br.58/14, 88/15, 96/15 i 53/16).

Slijedom navedenog, molimo da dostavljeni materijal prosljedite Parlamentarnoj skupštini Bosne i Hercegovine.

S poštovanjem,



Prilog:
-kao u tekstu (x3)

Dostavljeno:
- naslovu,
- u spis.

„P.Z.E.I.“

PRIJEDLOG

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine na sjednici Predstavničkog doma, održanoj _____ 2023. godine i na sjednici Doma naroda, održanoj _____ 2023. godine, usvojila je

ZAKON
O SLOBODI PRISTUPA INFORMACIJAMA NA NIVOU INSTITUCIJA
BOSNE I HERCEGOVINE

DIO PRVI - UVODNE ODREDBE

Član 1.

(Predmet zakona)

(1) Ovim zakonom propisuje se pravo na pristup informacijama i ponovu upotrebu dokumenata u posjedu institucija vlasti Bosne i Hercegovine, pravnih lica koja osnivaju institucije Bosne i Hercegovine shodno odredbama Zakona o registraciji pravnih lica koja osnivaju institucije Bosne i Hercegovine („Službeni glasnik BiH“, br. 37/03 i 76/11) i nezavisnih organa Bosne i Hercegovine osnovanih posebnim zakonom (u daljem tekstu: institucije BiH), a koje se ostvaruje na način i u postupku propisanim ovim zakonom.

(2) Ovim zakonom preuzimaju se odredbe Direktive (EU) 2019/1024 Evropskog parlamenta i Vijeća od 20. juna 2019. godine o otvorenim podacima i ponovnoj upotrebi dokumenata javnog sektora.

Član 2.

(Obim primjene)

(1) Odredbe ovog zakona ne primjenjuju se na stranke u sudskom, upravnom i na zakonu osnovanim postupcima, kojima je dostupnost informacijama iz tih postupaka utvrđena posebnim propisom.

(2) Odredbe ovog zakona ne primjenjuju se na informacije za koje postoji obaveza čuvanja tajnosti, u skladu s posebnim propisima koji uređuju područje tajnih podataka.

Član 3.

(Cilj zakona)

Cilj ovog zakona je omogućiti i osigurati ostvarivanje prava na slobodan pristup informaciji fizičkom i pravnom licu, putem otvorenosti i javnosti djelovanja institucija BiH, u skladu s međunarodnim ugovorima o ljudskim pravima i slobodama i opće prihvaćenim pravilima međunarodnog prava, ovim i

drugim zakonom, radi ostvarenja i zaštite interesa javnosti i ostvarenja slobodnog i demokratskog poretka i otvorenog društva.

Član 4.

(Upotreba izraza u muškom i ženskom rodu)

Riječi koje su radi preglednosti u ovom zakonu navedene u jednom rodu, bez diskriminacije se odnose i na muški i na ženski rod.

Član 5.

(Značenje pojedinih izraza)

Izrazi koji se koriste u ovom zakonu imaju sljedeće značenje:

- a) **„korisnik prava na pristup informacijama i ponovu upotrebu dokumenata“** (u daljem tekstu: korisnik) je svako domaće ili strano fizičko i pravno lice;
- b) **„institucija BiH“**, u smislu odredaba ovog zakona je organ zakonodavne, sudske ili izvršne vlasti koji je zasnovan zakonom, kojemu je zakonom povjereno vršenje javnih ovlaštenja, koji se finansira iz javnih prihoda, kao i kojemu je posebnim zakonom povjereno vršenje poslova uprave na nivou Bosne i Hercegovine. Institucija BiH je i pravno lice koje osnivaju institucije Bosne i Hercegovine shodno odredbama Zakona o registraciji pravnih lica koja osnivaju institucije Bosne i Hercegovine i drugi subjekti Bosne i Hercegovine osnovani posebnim zakonom;
- c) **„informacija“** podrazumijeva svaki sadržaj u posjedu institucija BiH, zabilježen u bilo kojem obliku, a koji je institucija BiH sačinila, primjenila ili dobila nezavisno od vremena nastanka ili kategorizacije;
- d) **„dokument“** znači svaki sadržaj bez obzira na medij (papir ili elektronski oblik ili kao zvučni, vizuelni ili audiovizuelni zapis) ili svaki dio takvog sadržaja;
- e) **„međunarodna informacija“** je informacija koju je Bosni i Hercegovini ustupila strana država ili međunarodna organizacija s kojom Bosna i Hercegovina saraduje ili je članica iste;
- f) **„pravo na pristup informaciji“** obuhvata pravo na traženje i dobivanje informacije kao i obavezu institucija BiH da omogući pristup zatraženoj informaciji, odnosno da objavljuje informaciju nezavisno od postavljenog zahtjeva, kada takvo objavljivanje proizilazi iz obaveze propisane zakonom ili drugim propisom;
- g) **„ponova upotreba dokumenata“** znači upotrebu dokumenata u posjedu institucije BiH, u komercijalu ili nekomercijalnu svrhu različitu od izvorne svrhe za koju je dokument nastao, a koja se ostvaruje u okviru zakonom ili drugim propisom određenog djelokruga ili posla, koji se uobičajeno smatra javnim poslom. Razmjena dokumenata između institucija BiH radi vršenja poslova iz njihovog djelokruga ne predstavlja ponovu upotrebu;
- h) **„test razmjernosti i javnog interesa“** je procjena razmjernosti između razloga za omogućavanje pristupa informaciji i razloga za ograničenje te omogućavanje pristupa informaciji ako prevlada javni interes;
- i) **„vlasnik informacije“** je institucija BiH u okviru čijeg djelokruga je nastala informacija, odnosno organ druge države ili međunarodne organizacije u okviru čijeg djelokruga rada je nastala međunarodna informacija;

- j) „**centralni portal javnih informacija**“ je javno dostupan alat na internetu, koji korisnicima omogućava trajni pristup informacijama pohranjenim u bazi elektronskih dokumenata i/ili fizičkim zbirka dokumenata;
- k) „**mašinski čitljiv oblik**“ je oblik datoteke strukturiran tako da ga programska aplikacija može lako identifikovati, prepoznati i iz njega izdvojiti određene podatke, uključujući pojedinačne podatke i njihovu unutrašnju strukturu;
- l) „**otvoreni oblik**“ je oblik datoteke koji je nezavisan o korištenoj platformi i dostupan javnosti bez ograničenja koja bi sprečavala ponovu upotrebu;
- m) „**portal otvorenih podataka**“ je podaktočni čvor koji služi za prikupljanje, kategorizaciju i distribuciju otvorenih podataka institucija BiH. Portal predstavlja svojevrsni katalog metapodataka koji omogućava lakše pretraživanje otvorenih podataka;
- n) „**metapodaci**“ su podaci o podacima, odnosno podaci koji opisuju karakteristike nekog izvora. Oni mogu opisivati jedan podatak, cijelu grupu podataka ili samo neki dio cjeline;
- o) „**proaktivna objava informacija**“ je kontinuirana samoinicijativna objava određenih vrsta informacija na internet stranicama institucija BiH u otvorenom obliku, koji podrazumijeva oblik datoteka, koji je nezavisan o korištenoj platformi i bez ograničenja za ponovljenu upotrebu;
- p) „**odgovorno lice**“ u smislu ovog zakona je lice zaposleno u instituciji BiH, čije je činjenje ili nečinjenje dovelo do povrede odredaba ovog zakona;
- r) „**Žalbena vijeće pri Vijeću ministara Bosne i Hercegovine**“ (u daljem tekstu: **Žalbena vijeće**) je pravno lice za rješavanje po žalbi u drugostepenom postupku;
- s) „**treće lice**“ je bilo koje fizičko ili pravno lice koje posjeduje podatke, a nije institucija BiH;
- t) „**lični podatak**“ je podatak definisan shodno propisima o zaštiti ličnih podataka.

DIO DRUGI - PRINCIPI ZAKONA

Član 6.

(Principi transparentnosti i otvorenosti, ravnopravnost spolova, zabrana diskriminacije i zaštita ličnih podataka)

- (1) Sve informacije institucija BiH smatraju se otvorenim i javnim, osim ako je neobjavlivanje u potpunosti opravdano i zasnovano na zakonom propisanim izuzecima.
- (2) Ovaj zakon je zasnovan na principu zabrane diskriminacije u skladu s odredbama Zakona o zabrani diskriminacije u Bosni i Hercegovini („Službeni glasnik BiH“ br. 59/09 i 66/16).
- (3) Ovaj zakon je zasnovan na principu ravnopravnosti spolova, u skladu s odredbama Zakona o ravnopravnosti spolova u Bosni i Hercegovini („Službeni glasnik BiH“, broj 32/10-prešišćen tekst).
- (4) Institucije BiH, te svako fizičko ili pravno lice na koje se odnose odredbe ovog zakona dužni su dosljedno postupiti shodno propisima o zaštiti ličnih podataka.

Član 7.

(Princip slobode pristupa informaciji)

Sve informacije dostupne su svakom domaćem ili stranom fizičkom i pravnom licu, bilo putem proaktivne objave ili putem podnošenja zahtjeva za slobodu pristupa informaciji.

Član 8.

(Princip otvorene vlasti)

Kako bi se promoviralo dobro upravljanje, osiguralo učešće javnosti i borba protiv korupcije, institucije BiH će, u vršenju svoje funkcije pružati usluge što je moguće otvorenije.

Član 9.

(Princip pravovremenosti, potpunosti i tačnosti informacija)

Institucije BiH dužne su osigurati lak, brz i efikasan pristup informacijama, tako da informacije koje institucije BiH objavljuju, odnosno daju, moraju biti pravovremene, potpune i tačne.

Član 10.

(Princip jednakosti korisnika)

(1) Pravo na pristup informacijama i ponovu upotrebu dokumenata pripada svim korisnicima na jednak način i pod jednakim uslovima.

(2) Vlasnik informacije ne smije staviti korisnike u neravnopravan položaj, a osobito na način da se pojedinim korisnicima informacija pruža prije nego ostalima ili na način koji ih stavlja u povoljniji položaj.

Član 11.

(Princip raspolaganja informacijom)

Korisnik koji raspolaže informacijom, u skladu s ovim zakonom, ima pravo tu informaciju javno iznositi.

Član 12.

(Princip međusobnog poštovanja i saradnje)

Odnos institucija BiH i korisnika, zasniva se na saradnji i pružanju pomoći, te međusobnom uvažavanju i poštivanju ljudskog dostojanstva.

Član 13.

(Princip besplatnog ustupanja informacija)

Vlasnik informacije dužan je besplatno ustupiti informaciju, kao i ponovu upotrebu informacije.

DIO TREĆI - OBAVEZA INSTITUCIJA BiH

Član 14.

(Proaktivna objava informacija)

(1) Institucija BiH dužna je, na svojoj internet stranici ili na drugi pogodan način, redovno objavljivati i ažurirati informacije iz svog djelokruga rada na lako dostupan način, kada je to god moguće i odgovarajuće, u mašinski čitljivom obliku, u roku od 15 dana od dana nastanka informacije.

(2) Obaveza iz stava (1) uključuje posebno sljedeće vrste informacija:

- a) informacije o instituciji BiH, kao što su pravni osnov propisan zakonom, kao i drugim pravnim okvirom, djelokrug rada, popis ključnih poslova i dokumenata, koje donosi institucija BiH, interni akti, funkcije, nadležnosti i ovlaštenja institucije BiH;
- b) informacije o organizaciji institucije BiH kao što su: organizacijska struktura, informacije o zaposlenima (ime i prezime, radno mjesto, stepen školske spreme, iznos plate i kontakt informacije), zatim statističke podatke i izvještaj o radu;
- c) informacije o radu, kao što su strategije, planovi rada, politike, aktivnosti i akcioni planovi;
- d) odluke i akte, kao što su propisi, opći akti i dokumenti koje donosi institucija BiH, a koji utiču na interese korisnika;
- e) informacije o načinu odlučivanja i mogućnostima učestvovanja javnosti, uključujući informacije o javnim savjetovanjima i drugim oblicima učestvovanja, informacije o sjednicama, dnevnom redu, zaključcima i zapisnicima sa sjednica, kao i omogućavanja prisutnosti javnosti na sjednicama, u smislu navođenja načina i rokova prijave, kao i broja učesnika;
- f) informacije o finansiranju, kao što su planirani budžet, izvještaj o prihodima i rashodima, revizija i evaluacija i druge finansijske informacije;
- g) informacije o bespovratnim sredstvima koje dodjeljuje institucija BiH, kao što su subvencije, donacije, potpore, projektna sredstva uz navođenje primaoca, iznosa i perioda na koji se sredstva dodjeljuju;
- h) informacije o javnim nabavkama, uključujući informacije o postupku javne nabavke, kriterijima, rezultatima, ugovorima i izvještaji o ispunjenju ugovora;
- i) informacije o javnim konkursima, uključujući i tekst konkursa, dokumentaciju potrebnu za učestvovanje u konkursu (ako postoji), fazama u postupku konkursa, kao i konačnom rezultatu konkursa;
- j) informacije o uslugama koje institucija BiH pruža korisnicima, kao što su naziv i pravni osnov, upute, rokovi, formulari, informacije o naknadama, taksama i drugim plaćanjima;
- k) informacije o registrima, bazama i popisima, koje institucija BiH vodi, način pristupa (internetom ili na drugi način), odnosno poveznica na one kojima se može pristupiti internetom;
- l) informacije o pravu na pristup informacijama koji uključuje informacije o načinu ostvarivanja prava, pravnom okviru, procedurama za ostvarivanje prava, kontakt informacijama službenika za informisanje, pravu na žalbu i predstavku, formular za podnošenje zahtjeva, godišnji izvještaj, registar zahtjeva i druge pojedinosti za korisnike prava na pristup informacijama;
- m) druge informacije, za koje obaveza objavljivanja proizilazi iz posebnog zakona ili drugog propisa.

(3) Osim informacija navedenih u stavu (2) ovog člana, institucija BiH objavljuje i sve druge informacije važne za rad, organizaciju, odlučivanje i finansiranje, što uključuje i objavljivanje informacija u obliku vodiča, sažetka i drugim razumljivim oblicima pristupačnim korisnicima informacija, objavljivanje važnih informacija na oglasnoj tabli institucija BiH, kao i osiguravanje određenog broja primjeraka važnijih dokumenata.

Član 15.

(Dostavljanje dokumenata u Centralni portal javnih informacija)

(1) Institucije BiH dužne su dokumente iz člana 14. stava (2) ovog zakona u elektronskom obliku objavljivati i ažurirati na Centralnom portalu javnih informacija radi njihove trajne dostupnosti.

(2) Poslove vođenja i održavanja Centralnog portala javnih informacija vrši Generalni sekretarijat Vijeća ministara Bosne i Hercegovine.

(3) Način organizovanja, vođenja Centralnog portala javnih informacija na nivou institucija Bosne i Hercegovine propisuju se pravilnikom, koji se zasniva na sadržini Politike proaktivne transparentnosti, a koji na prijedlog Generalnog sekretarijata Vijeća ministara Bosne i Hercegovine donosi Vijeće ministara Bosne i Hercegovine, u roku od devet mjeseci od dana stupanja na snagu ovog zakona.

Član 16.

(Javnost rada)

(1) Institucija BiH obavezna je javnost informisati o:

- a) sjednicama i dnevnom redu zasjedanja, vremenu održavanja, načinu rada i mogućnostima neposrednog uvida u njihov rad;
- b) broju lica kojima se može istovremeno osigurati neposredan uvid u rad institucije BiH, pri čemu se mora voditi računa o redoslijedu prijavljivanja.

(2) Institucija BiH nije dužna osigurati neposredan uvid u svoj rad kada se radi o pitanjima u kojima se po zakonu javnost mora isključiti, odnosno ako se radi o informacijama za koje postoje ograničenja prava na pristup informacijama, u skladu s odredbama ovog zakona.

(3) Institucija BiH preduzima mjere da objavi sadržaj javnih dokumentata, kada je to u interesu promovisanja transparentnosti i efikasnosti rada institucije BiH, kao i podsticanja informativnog učinka javnosti u vezi pitanja od javnog interesa.

Član 17.

(Službenik za informisanje)

(1) Institucija BiH je obavezna radi osiguravanja pristupa informacijama, imenovati službenika za informisanje, u roku od šest mjeseci dana od dana stupanja na snagu ovog zakona, čiji se službeni podaci s kontakt adresom dostavljaju instituciji Ombudsmena za ljudska prava Bosne i Hercegovine i Žalbenom vijeću, te objavljuju na internet stranici institucije BiH, u roku od osam dana od dana imenovanja.

(2) Žalbeno vijeće vodi listu institucija BiH koje su obavezne da postupaju po ovom zakonu, kao i listu službenika za informisanje, koju objavljuju u mašinski čitljivom formatu na internet stranici Žalbenog vijeća, uz obavezu redovnog ažuriranja.

(3) Institucija BiH je obavezna osigurati da se svaki zahtjev za slobodu pristupa informacijama dostavi u nadležno postupanje organizacionoj jedinici u okviru institucije BiH, koja je vlasnik informacije, radi provođenja postupka donošenja rješenja po zahtjevu.

(4) Rješenje iz stava (3) ovog člana obavezno se dostavlja i službeniku za informisanje institucije BiH.

(5) Službenik za informisanje uredno vodi evidencije o broju primljenih zahtjeva, vrsti traženih informacija, broju donesenih rješenja, broju konačnih rješenja, broju zahtjeva po kojima nisu donijeta rješenja i načinu postupanja organa javne vlasti.

(6) Evidenciju iz stava (5) ovog člana, službenik za informisanje, svaka tri mjeseca, dostavlja rukovodiocu institucije BiH, Žalbenom vijeću i instituciji Ombudsmena za ljudska prava Bosne i Hercegovine.

(7) Sastavni dio izvještaja iz stava (6) ovog člana čine analiza i ocjena ostvarivanja prava na pristup informacijama i ponovu upotrebu informacija u instituciji BiH, podaci i analiza o predmetima po žalbama, inspekcijском nadzoru i počinjenim prekršajima zbog povrede prava na pristup informacijama i ponove upotrebe dokumenata, s prijedlozima mjera za otklanjanje nedostataka i nepravilnosti.

(8) Službenik za informisanje dužan je sačiniti i u godišnji izvještaj o radu institucije BiH, koje se u zakonom propisanoj proceduri upućuje Vijeću ministara Bosne i Hercegovine i Parlamentarnoj skupštini Bosne i Hercegovine, koje obavezno uključuje i evidenciju o broju primljenih zahtjeva, vrsti traženih informacija, broju donesenih rješenja, broju konačnih rješenja, broju zahtjeva po kojima nisu donesena rješenja i načinu postupanja institucije BiH.

(9) Godišnji izvještaj iz st. (6) i (7) ovog člana, službenik za informisanje obavezno objavljuje i na internet stranici institucije BiH.

(10) Službenik za informisanje vrši poslove redovnog objavljivanja i ostalih informacija shodno unutrašnjoj organizaciji institucije BiH.

(11) Vijeće ministara Bosne i Hercegovine, na prijedlog Ministarstva pravde Bosne i Hercegovine, u cilju efikasnijeg provođenja ovog zakona, donosi Vodič za pristup informacijama, kojim se detaljno uređuje način ostvarivanja prava građana na pristup informacijama koje su u posjedu institucija BiH s pripadajućim obrascima, kojima se osigurava da se na brži i jednostavniji način ostvari pravo na pristup informacijama, a koje se objavljuju na internet stranici institucije BiH, u roku od 90 dana od dana stupanja na snagu ovog zakona.

Član 18. (Registar zahtjeva)

(1) Službenik za informisanje u instituciji BiH vodi poseban registar zahtjeva za pristup informacijama, koji sadrži upise o proceduralnim koracima, o rješenju zahtjeva, kao i podatke o žalbenom ili sudskom postupku.

(2) Institucija BiH objavljuje podatke iz registra zahtjeva na svojoj internet stranici, uz zaštitu ličnih podataka korisnika i trećih lica, u skladu sa zakonom kojim se uređuje zaštita ličnih podataka.

(3) Sadržaj i način vođenja registra iz stava (1) ovog člana propisuje pravilnikom ministar pravde Bosne i Hercegovine, u roku od 90 dana od dana stupanja na snagu ovog zakona.

DIO ČETVRTI - OGRANIČENJE PRAVA NA PRISTUP INFORMACIJAMA

Član 19. (Ograničenja i njihovo trajanje)

(1) Informacija u posjedu institucije BiH je javna, a pravo na pristup informaciji se ostvaruje na način i u postupku propisanim ovim zakonom.

(2) Pristup informacijama može se ograničiti u cilju zaštite privatnosti fizičkih lica, zaštite ličnih podataka korisnika i trećih lica, u skladu sa zakonom kojim se uređuje zaštita ličnih podataka.

(3) Ograničenje iz stava (2) ovog člana se ne primjenjuje na informacije o imenima zaposlenih, rukovodećih službenika i drugih lica, koja učestvuju u javnim poslovima, njihovim platama, drugim prihodima plaćenim iz budžetskih sredstava, troškovima koji se odnose na javne aktivnosti tog lica, postojanje sukoba interesa, kao i njihove kvalifikacije.

(4) Pristup informacijama može biti ograničen ako se može razumno očekivati da bi omogućavanjem pristupa informaciji nastala ozbiljna šteta u pogledu sljedećih interesa:

- a) nacionalne sigurnosti i međunarodnih odnosa, ako informacija nosi oznaku tajnosti, u skladu sa zakonom ili općim aktom donesenim na osnovu zakona kojim se propisuje tajnost podataka;
- b) javnog reda, ako informacija nosi oznaku tajnosti, u skladu sa zakonom ili općim aktom donesenim na osnovu zakona kojim se propisuje tajnost podataka;
- c) u toku inspekcije, kontrole i nadzora kojeg provodi institucija BiH ako bi se njenim objavljivanjem onemogućio rad organa koji vrši upravni nadzor, inspeksijski nadzor, odnosno nadzor zakonitosti rada i akata;
- d) komercijalnih i drugih ekonomskih interesa, te ekonomske, monetarne i tečajne politike i;
- e) okoliša.

(5) Institucija BiH ograničit će pristup informacijama koje se tiču jednakosti stranaka u sudskim postupcima i učinkovitosti pravosuđa, postupaka koje vode nadležni organi u prethodnom krivičnom ili disciplinskom postupku za vrijeme trajanja tih postupaka, osim ako posebnim zakonom nije drugačije propisano, i ukoliko bi se objavljivanjem informacije onemogućilo učinkovito, nezavisno i nepristrasno izvršenje odluke ili sankcije institucije BiH.

(6) Institucija BiH može ograničiti pristup informaciji ako se radi o informaciji u postupku izrade unutar jednog ili među više institucija BiH, radnih grupa ili komisija, te u razmjeni stavova i mišljenja, čije bi objavljivanje prije završetka izrade cjelovite i konačne informacije moglo ozbiljno narušiti proces njene izrade.

(7) Institucija BiH može ograničiti pristup informaciji:

- a) ako je informacija poreska tajna, shodno zakonu;
- b) u slučaju ponove upotrebe informacije od strane podnosioca zahtjeva, ako je informacija zaštićena propisima kojima se uređuje pravo intelektualnog vlasništva.

(8) Informacije iz st. (4) i (7) ovog člana postaju dostupne javnosti nakon što prestanu razlozi na osnovu kojih je institucija BiH ograničila pravo na pristup informaciji.

Član 20.

(Test razmjernosti i javnog interesa)

(1) Institucija BiH može objaviti traženu informaciju, bez obzira na utvrđeni izuzetak propisan ovim zakonom, ako je to opravdano javnim interesom i uzeti u obzir svaku korist i svaku štetu koja može proisteći iz toga.

(2) Prilikom odlučivanja da li je objavljivanje informacije opravdano javnim interesom, institucija BiH razmatra okolnosti kao što su, ali nisu ograničene na, svako nepoštivanje zakonske obaveze, postojanje bilo kakvog prijestupa, sudske pogreške, zloupotrebu vlasti ili nemar u vršenju službene funkcije, neovlašteno korištenje javnih fondova, ili opasnost po zdravlje ili sigurnost pojedinca, javnosti ili okoline.

(3) Ako institucija BiH utvrdi informaciju kao izuzetak u javnom interesu, rješenjem obaviještava podnosioca zahtjeva.

Član 21.

(Razdvajanje ili djelimičan pristup informaciji)

Ako se utvrdi da je dio tražene informacije izuzet, nadležna institucija BiH će razdvojiti taj dio i podijeliti ostatak informacije, uz precizno navođenje koji izuzetak ili izuzeci su primjenjeni i na koje dijelove dokumenta ili dokumenata.

DIO PETI - POSTUPAK OSTVARIVANJA PRAVA NA PRISTUP INFORMACIJAMA

Član 22.

(Ostvarivanje prava na pristup informaciji)

(1) Institucija BiH obavezna je omogućiti pristup informacijama:

- a) blagovremenim objavljivanjem informacija o svom radu na primjeren i dostupan način, odnosno na internet stranicama institucija BiH, Centralnom portalu javnih informacija institucija BiH ili objavom u službenom ili javnom glasilu;
- b) davanjem informacije korisniku koji je podnio zahtjev na jedan od sljedećih načina:
 - 1) neposrednim davanjem informacije;
 - 2) davanjem informacije pisanim putem;
 - 3) omogućavanjem uvida u dokumente i izradu kopije dokumenta koji sadrže traženu informaciju;
 - 4) dostavljanjem kopije dokumenata koji sadrži traženu informaciju;
 - 5) na drugi način koji je prikladan za ostvarivanje prava na pristup informaciji.

(2) Podnosilac zahtjeva može u zahtjevu za pristup informaciji naznačiti prikladan način prijema informacije, a ako ne naznači, informacija će se dostaviti na način na koji je podnesen zahtjev, odnosno na najekonomičniji način.

Član 23.

(Pristup informacijama po zahtjevu stranke)

(1) O zahtjevu za pristup informacijama odlučuje institucija BiH koja je vlasnik informacije tražene zahtjevom.

(2) Podnosilac zahtjeva ostvaruje pravo na pristup informaciji podnošenjem pismenog zahtjeva nadležnoj instituciji BiH na jednom od jezika i pisama u službenoj upotrebi u Bosni i Hercegovini.

(3) Pisani zahtjev sadrži: naziv i sjedište institucije BiH, podatke koji su važni za prepoznavanje tražene informacije, ime, prezime i adresu fizičkog lica koji je korisnik informacije, odnosno naziv i sjedište pravnog lica.

(4) Pisanim zahtjevom u smislu stava (2) ovog člana smatra se zahtjev podnesen elektronskom poštom, pod uslovom da sadrži sve elemente navedene u stavu (3) ovog člana.

(5) Podnosilac zahtjeva nije obavezan navesti razloge zbog kojih traži pristup informaciji.

(6) Ne smatra se zahtjevom za pristup informacijama, davanje mišljenja, objašnjenja ili uputa vezano uz ostvarivanje nekog prava ili izvršavanje obaveze, izrade analize ili tumačenje nekog propisa, kao ni stvaranje nove informacije.

(7) Ako institucija BiH koja je zaprimila zahtjev nije vlasnik informacije, dužna je, u roku od osam dana od zaprimanja zahtjeva ustupiti zahtjev instituciji BiH koja, u skladu sa svojim nadležnostima, posjeduje informaciju i o tome obavijestiti podnosioca zahtjeva, u kom slučaju rok za rješavanje zahtjeva teče od dana kada je institucija BiH, kojoj je upućen zahtjev, isti zaprimila.

(8) Ako institucija BiH ne posjeduje informaciju i ne može uz razumno uloženi trud, utvrditi koja institucija BiH je vlasnik informacije, o zahtjevu će u roku od osam dana donijeti zaključak kojim će odbaciti zahtjev zbog nenadležnosti, s uputom o pravu na žalbu Žalbenom vijeću.

(9) Ako je zahtjevom zatražena informacija koja je klasifikovana stepenom tajnosti, shodno zakonu kojim se uređuje tajnost podataka, institucija BiH je dužna ustupiti zahtjev instituciji BiH koja je vlasnik te informacije.

Član 24.

(Administrativna taksa i naknada za pristup informacijama)

(1) Na zahtjev za pristup informacijama u postupcima pred institucijom BiH ne plaća se administrativna taksa.

(2) Institucija BiH ima pravo tražiti od podnosioca zahtjeva naknadu stvarnih materijalnih troškova, kao što su troškovi umnožavanja, skeniranja ili troškovi nosača podataka, kao i za naknadu troškova dostave tražene informacije.

(3) Institucija BiH je dužna podnosioca zahtjeva obavijestiti o obračunu troškova iz stava (2) ovog člana.

(4) Visinu naknade i način naplate naknade troškova iz stava (2) ovog člana, u skladu s tržišnim cijenama, propisuje odlukom Vijeće ministara Bosne i Hercegovine, u roku od šest mjeseci od dana stupanja na snagu ovog zakona, na prijedlog Ministarstva finansija i trezora Bosne i Hercegovine.

(5) Prihod od naknade troškova ostvarenih na osnovu stava (2) ovog člana je prihod Budžeta institucija Bosne i Hercegovine.

Član 25.

(Rokovi)

(1) Na osnovu zahtjeva za pristup informacijama, institucija BiH je obavezna rješenjem odlučiti po zahtjevu za pristup informaciji bez odgađanja, a najkasnije u roku od 15 dana od dana podnošenja urednog zahtjeva.

(2) U slučaju nepotpunog ili nerazumljivog zahtjeva, institucija BiH će pozvati podnosioca zahtjeva da isti ispravi u roku od pet dana od dana zaprimanja poziva za ispravku.

(3) Ako podnosilac zahtjeva ne ispravi zahtjev na odgovarajući način, a na osnovu dostavljenog se ne može sa sigurnošću utvrditi o kojoj se traženoj informaciji radi, institucija BiH će zaključkom odbaciti zahtjev kao neuredan.

(4) Rok iz stava (1) ovog člana može se produžiti za još pet radnih dana, računajući od dana kada je institucija BiH trebala odlučiti o zahtjevu za pristup informaciji u slučaju ako se jednim zahtjevom traži veći broj različitih informacija, o čemu je institucija BiH dužna bez odgađanja obavijestiti podnosioca zahtjeva i navesti razloge zbog kojih je taj rok produžen.

(5) Ako institucija BiH ne odluči o zahtjevu za pristup informacijama u rokovima propisanim ovim članom, podnosilac zahtjeva ima pravo podnijeti žalbu zbog šutnje administracije.

Član 26.

(Rješavanje po zahtjevu)

(1) Po prijemu zahtjeva za pristup informacijama, institucija BiH koja rješava zahtjev, dužna je preduzeti sve potrebne radnje na prikupljanju zahtjevano informacije, a kada provodi test javnog interesa, razmotriti i sve činjenice i okolnosti značajne za obradu zahtjeva u roku utvrđenom članom 25. ovog zakona.

(2) Institucija BiH ne donosi rješenje po zahtjevu u slučaju:

- a) kad obavještava korisnika da je istu informaciju već dobio, a nije protekao rok od 90 dana računajući od dana podnošenja prethodnog zahtjeva;
- b) kad obavještava korisnika da je informacija javno objavljena;
- c) kad obavještava podnosioca zahtjeva da mu je kao stranci u postupku, dostupnost informacija iz sudskih, upravnih i drugih na zakonu osnovanih postupaka utvrđena posebnim propisom;
- d) kad obavještava podnosioca zahtjeva da za informaciju postoji obaveza zaštite, odnosno čuvanja tajnosti, shodno članu 2. stavovima (2) i (3) ovog zakona;
- e) kad obavještava podnosioca zahtjeva da se podnesak ne smatra zahtjevom u smislu člana 23. ovog zakona, pri čemu je institucija BiH dužna uputiti podnosioca zahtjeva na način ostvarivanja njegovog zahtjeva.

(3) O postojanju razloga koji su utvrđeni stavom (2) tačkama b), c), d) i e) ovog člana, institucija BiH je obavezna bez odgađanja, a najkasnije u roku od osam dana od dana prijema zahtjeva obavijestiti podnosioca zahtjeva pisanim putem i omogućiti pravo na žalbu Žalbenom vijeću.

(4) Institucija BiH donosi rješenje kad korisniku omogućava pristup informaciji primjenom odredbe člana 25. stava (1) ovog zakona.

(5) Institucija BiH će zaključkom, u zakonskom roku odbaciti zahtjev s uputom o mogućnosti podnošenja žalbe Žalbenom vijeću, ako ne posjeduje informaciju i ne može uz razumno uloženi trud utvrditi koja institucija BiH posjeduje informaciju, odnosno nema saznanja gdje se informacija nalazi.

(6) Institucija BiH će rješenjem odbiti zahtjev:

- a) ako su ispunjeni uslovi propisani u članu 19. st. (4), (6) i (7) ovog zakona;
- b) ako utvrdi da nema osnova za dopunu ili ispravak date informacije iz člana 27. ovog zakona;
- c) ako se traži informacija koja se ne smatra informacijom u smislu člana 5. stava (1) tačke c) ovog zakona;
- d) ako jedan ili više međusobno povezanih podnosilaca putem jednog ili više funkcionalno povezanih zahtjeva očito zloupotrebljava pravo na pristup informacijama, a osobito kad zbog učestalih zahtjeva za dostavu istih ili istovrsnih informacija ili zahtjeva kojima se traži veliki broj informacija dolazi do opterećavanja rada i redovnog funkcionisanja institucija BiH.

Član 27.

(Dopuna i ispravka informacije)

- (1) Ako podnositelj zahtjeva smatra da informacija pružena na osnovu zahtjeva nije tačna ili potpuna, može zahtijevati njezinu ispravku, odnosno dopunu u roku od 15 dana od dana dobivanja informacije.
- (2) Institucija BiH je obavezna odlučiti o zahtjevu za dopunu, odnosno ispravku informacije iz stava ovog člana, bez odgađanja, a najkasnije u roku od 15 dana od dana zaprimanja zahtjeva, shodno odredbama člana 25. ovog zakona.

Član 28.

(Pravo na žalbu)

- (1) Protiv rješenja institucije BiH donesenog u prvostepenom postupku po zahtjevu za pristup informaciji, podnositelj zahtjeva može izjaviti žalbu.
- (2) Žalba iz stava (1) ovog člana izjavljuje se Žalbenom vijeću, u roku od 15 dana od dana prijema rješenja.
- (3) Podnositelj zahtjeva ima pravo izjaviti žalbu u slučaju kada institucija BiH ne odluči o zahtjevu podnosioca u roku od 15 dana i kada institucija BiH ne donosi rješenje iz člana 26. stava (2).
- (4) Žalba iz stava (1) ovog člana ne odgoda izvršenje rješenja.
- (5) Žalbeno vijeće je dužno rješenje po žalbi donijeti i dostaviti podnosiocu zahtjeva, putem prvostepenog organa, najkasnije u roku od 30 dana, od dana prijema žalbe.
- (6) Ako Žalbeno vijeće ne odluči po žalbi u roku iz stava (5) ovog člana, podnositelj žalbe ima pravo pokrenuti upravni spor pred Sudom Bosne i Hercegovine, zbog šutnje administracije.
- (7) Institucija BiH dužna je Žalbenom vijeću u postupku po žalbi protiv rješenja o ograničenju informacije iz člana 19. st. (2) i (3) ovog zakona, omogućiti uvid u informacije koje su predmet postupka.
- (8) Za informacije iz člana 19. stava (4) tačke a) ovog zakona, Žalbeno vijeće može zatražiti mišljenje od Ministarstva sigurnosti Bosne i Hercegovine kao Državnog sigurnosnog organa formiranog shodno članu 75. Zakona o zaštiti tajnih podataka Bosne i Hercegovine („Službeni glasnik BiH“, br.54/05 i 12/09).
- (9) Kada Žalbeno vijeće, za informacije iz stava (8) ovog člana, traži mišljenje sigurnosnog organa, dužno je rješenje donijeti i dostaviti podnosiocu žalbe putem prvostepenog organa, najkasnije u roku od 90 dana.
- (10) Kada Žalbeno vijeće, u postupku rješavanja po žalbi, treba ispitati pravilnost provedenog testa razmjernosti i javnog interesa, odnosno provesti test razmjernosti i javnog interesa, rješenje po žalbi dužno je donijeti i dostaviti podnosiocu žalbe putem prvostepenog organa, najkasnije u roku od 60 dana.
- (11) Kada utvrdi da je žalba osnovana, Žalbeno vijeće će rješenjem naložiti instituciji BiH da podnosiocu žalbe omogući pristup traženoj informaciji, odnosno da odluči o zahtjevu stranke, te odredi primjeren rok u kojem je dužno to učiniti.
- (12) Smatra se da je institucija BiH onemogućila ili ograničila pristup informaciji podnosiocu zahtjeva, ako ne postupi po rješenju Žalbenog vijeća ili to ne učini u roku koji je odredilo Žalbeno vijeće.

Član 29.
(Sudska zaštita)

(1) Protiv rješenja Žalbenog vijeća nije dopuštena žalba, ali se može pokrenuti upravni spor pred Sudom Bosne i Hercegovine, koji postupak se smatra hitnim i Sud mora donijeti odluku po tužbi u roku od 60 dana.

(2) Tužba iz stava (1) ovog člana odgađa izvršenje rješenja, ako je rješenjem omogućen pristup informaciji.

(3) Upravni spor iz stava (1) ovog člana može pokrenuti i institucija BiH koja je donijela prvostepeno rješenje.

DIO ŠESTI - PONOVDNA UPOTREBA DOKUMENATA

Član 30.
(Pravo na ponovnu upotrebu dokumenata)

(1) Svaki korisnik ima pravo na ponovnu upotrebu dokumenata u komercijalne ili nekomercijalne svrhe u skladu s odredbama ovog zakona.

(2) U svrhu ponovne upotrebe, institucija BiH nema obavezu dokument izraditi, prilagođavati ili izdvajati dijelove dokumenta, ako to zahtijeva nesrazmjern utrošak vremena ili sredstava, niti se od institucije BiH može zahtijevati da nastavi ažurirati, nadograđivati i pohranjivati dokumente u svrhu ponovne upotrebe.

(3) Na pitanja koja nisu posebno uređena ovim dijelom zakona, primjenjivat će se na odgovarajući način ostale odredbe ovog zakona.

Član 31.
(Praktična rješenja za ponovnu upotrebu dokumenata)

(1) U svrhu podsticanja i olakšavanja ponovne upotrebe dokumenata, institucija BiH dužna je na lako pretraživ način objaviti dokumente dostupne za ponovnu upotrebu, zajedno s metapodacima, u mašinski čitljivom i otvorenom obliku u skladu s otvorenim standardima na svojim internet stranicama i portalu iz člana 15. stav (1) ovog Zakona.

(2) Centralni portal javnih informacija, koji vodi i održava nadležna služba Generalnog sekretarijata Vijeća ministara Bosne i Hercegovine, osigurava popis dokumenata dostupnih za ponovnu upotrebu, zajedno s metapodacima, koji su objavljeni u skladu sa stavom (1) ovog člana.

(3) Odredba stava (2) ovog člana ne isključuje uspostavljanje i održavanje posebnih portala kojima se omogućava ponovna upotreba posebnih vrsta dokumenata za institucije BiH koje imaju specifične nadležnosti.

(4) U svrhu podsticanja i olakšavanja ponovne upotrebe dokumenata, institucije BiH koje imaju specifične nadležnosti, dužne su na način propisan u stavu (1) ovog člana objaviti dokumente na kojima imaju prava intelektualnog vlasništva.

(5) Kada je to moguće i prikladno, omogućit će se međujezičko traženje dokumenata.

Član 32.

(Postupanje po zahtjevu za ponovnu upotrebu dokumenata)

(1) U zahtjevu za ponovnu upotrebu dokumenata, podnositelj zahtjeva mora, osim podataka iz člana 23. stava (3) ovog zakona, navesti dokumente koje želi ponovo upotrijebiti, oblik i način na koji želi primiti sadržaj traženih dokumenata, kao i svrhu korištenja dokumenata (komercijalna ili nekomercijalna svrha).

(2) Institucija BiH obrađuje zahtjev za ponovnu upotrebu dokumenata koju je zaprimila elektronski i elektronski dostavlja odgovor na zahtjev, a ako podnositelj zahtjeva traži i dostavu dokumenata, institucija BiH će podnosioca zahtjeva uputiti na podnošenje pismenog zahtjeva u skladu s članom 23. ovog zakona.

(3) Institucija BiH će odlučiti o zahtjevu za ponovnu upotrebu dokumenata rješenjem, u roku od 15 dana od dana podnošenja urednog zahtjeva, kojim rješenjem se obavezno utvrđuju uslovi ponovne upotrebe dokumenata, kao i visina i način obračuna naknada.

(4) Rok iz stava (3) ovog člana može se produžiti za još 20 dana, računajući od dana kada je institucija BiH trebala odlučiti o zahtjevu za pristup informaciji, u slučaju da se radi o zahtjevu za ponovnu upotrebu dokumenata, čija sadržina zahtjeva duži rok za prikupljanje informacija i donošenje rješenja, o čemu je institucija BiH dužna pismeno obavijestiti podnosioca zahtjeva i navesti razlog za produženje roka.

(5) Institucija BiH postupat će po zahtjevu za ponovnu upotrebu dokumenata putem sredstava elektronske komunikacije kad god je to moguće i prikladno.

(6) Institucija BiH rješenjem će odbiti zahtjev, ako se zahtjev odnosi na:

- a) informaciju iz člana 19. st. (2), (4), (6) i (7) ovog zakona;
- b) povjerljive statističke informacije shodno zakonu;
- c) informacije za koje korisnik treba dokazati postojanje pravnog interesa;
- d) dijelove informacije koji sadrže samo logotipe, grbove ili oznake;
- e) informacije koje su u posjedu organa koji pružaju javne usluge radija, televizije i elektronskih medija;
- f) informacije koje su u posjedu organa koji imaju specifične nadležnosti;
- g) informacije koje se ne prikupljaju u svrhu vršenja javnog posla.

(7) Protiv rješenja o ponovnoj upotrebi dokumenata može se izjaviti žalba Žalbenom vijeću u roku od 15 dana.

(8) Protiv rješenja Žalbenog vijeća iz stava (7) ovog člana nije dopuštena žalba, ali se može pokrenuti upravni spor pred Sudom Bosne i Hercegovine.

(9) Ako institucija BiH odbije zahtjev za ponovnu upotrebu dokumenata, zbog zaštite prava intelektualnog vlasništva, dužna je obavijestiti podnosioca zahtjeva o nosiocu prava intelektualnog vlasništva, ako je poznat, odnosno o nosiocu licence od kojeg je institucija BiH dobila dokument.

(10) Arhiv Bosne i Hercegovine nije dužan obavijestiti podnosioca zahtjeva o nosiocu prava intelektualnog vlasništva, odnosno o nosiocu licence iz stava (9) ovog člana.

Član 33.

(Uslovi za ponovnu upotrebu dokumenata)

- (1) Institucija BiH podnosiocu zahtjeva daje podatke za ponovnu upotrebu bez ograničenja, za slobodnu upotrebu i u otvorenom formatu.
- (2) U opravdanim slučajevima, institucija BiH može odrediti uslove za ponovnu upotrebu, u kom slučaju njihov sadržaj i primjena ne smiju neopravdano ograničavati mogućnost ponovne upotrebe, niti se uslovi smiju koristiti kako bi se ograničilo tržišno takmičenje.
- (3) Uslovi za ponovnu upotrebu dokumenata ne smiju biti diskriminirajući za iste ili slične vrste dokumenata, odnosno za komercijalnu ili nekomercijalnu upotrebu.
- (4) Na instituciju BiH koja ponovo koristi svoje dokumente, kao osnov za komercijalne aktivnosti, koje ne spadaju u djelokrug javnih poslova institucije BiH, primjenjuju se isti uslovi kao za druge korisnike.
- (5) Vijeće ministara na prijedlog Ministarstva pravde Bosne i Hercegovine pravilnikom propisuje vrste i sadržaj uslova za ponovnu upotrebu dokumenata, u roku od šest mjeseci od dana stupanja na snagu ovog zakona.

Član 34.

(Administrativna taksa i naknada za ponovnu upotrebu dokumenata)

- (1) Institucija BiH ne naplaćuje administrativnu taksu i naknadu za ponovnu upotrebu dokumenata kad dokumente objavljuje na službenoj internet stranici.
- (2) Pregledanje zvaničnih dokumenata u prostorijama institucije BiH je besplatno.
- (3) Institucija BiH može podnosiocu zahtjeva naplatiti stvarne materijalne troškove ponovne upotrebe dokumenata nastale zbog reprodukcije, davanja na upotrebu i dostavu dokumenata, u skladu s kriterijima iz člana 24. stava (4) ovog zakona.
- (4) Iznimno, institucija BiH može korisniku naplatiti troškove iz stava (3) ovog člana ako je ispunjen jedan od sljedećih uslova:
 - a) institucija BiH pretežno se finansira iz vlastitih prihoda ili
 - b) korisnik zahtjeva, informacije kojima institucija BiH osigurava odgovarajuće prihode kojim pokriva troškove njihova prikupljanja, izrade, reprodukcije i objave.
- (5) U slučajevima iz stava (4) ovog člana institucija BiH će odrediti naknadu za ponovnu upotrebu u skladu s objektivnim, jasnim i provjerljivim kriterijima za izračun troškova ponovne upotrebe dokumenata koje Odlukom propisuje Vijeće ministara BiH u roku od šest mjeseci od dana stupanja ovog zakona, na prijedlog Ministarstva finansija i trezora Bosne i Hercegovine.
- (6) Ukupan godišnji prihod institucije BiH iz stava (4) ovog člana, ostvaren na osnovu naknade troškova shodno stavu (5) ovog člana, ne smije prelaziti troškove prikupljanja, izrade, reprodukcije i pružanja informacije, uključujući razuman povrat, u vezi s čim je institucija BiH dužna revidirati način izračuna naknade troškova na godišnjem nivou.
- (7) Institucija BiH dužna je na svojoj internet stranici informisati korisnike o kriterijima za naplatu troškova iz člana 24. stava (4) ovog zakona, kriterijima i načinu obračuna troškova iz stava (4) ovog člana, te o stvarno naplaćenom iznosu troškova ponovne upotrebe dokumenata na godišnjem nivou.

Član 35.
(Zabrana diskriminacije i isključiva prava)

- (1) Ponovna upotreba dokumenata dopuštena je i dostupna svim podnosiocima zahtjeva uz istu naknadu i pod istim uslovima, a broj podnosilaca zahtjeva kojima organ odobrava pravo na ponovnu upotrebu nije ograničen.
- (2) Institucija BiH ne može ugovorom ili drugim sporazumom ili odlukom odobriti podnosiocu zahtjeva ponovnu upotrebu dokumenata koja bi spriječila ponovnu upotrebu tih dokumenata od strane drugih korisnika.
- (3) Iznimno od stava (2) ovog člana, institucija BiH može odobriti isključivo pravo na ponovnu upotrebu dokumenata ako je to prijeko potrebno za pružanje javne usluge ili drugih usluga u javnom interesu, a o opravdanosti razloga za odobravanje takvog isključivog prava preispituje svake tri godine i obavještava Upravni inspektorat Ministarstva pravde Bosne i Hercegovine.
- (4) Upravni inspektorat Ministarstva pravde Bosne i Hercegovine vodi javno dostupnu evidenciju o svim odobrenim isključivim pravima.
- (5) Važeći ugovori i odluke o isključivim pravima moraju se objaviti na internet stranicama institucije BiH nakon stupanja na snagu ovog zakona.
- (6) Sadržaj i način vođenja evidencije isključivih prava za ponovnu upotrebu iz stava (4) ovog člana propisat će Vijeće ministara Bosne i Hercegovine, u roku od šest mjeseci od dana stupanja na snagu ovog zakona, na prijedlog Upravnog inspektorata Ministarstva pravde Bosne i Hercegovine.

DIO SEDMI - NADZOR NAD PROVOĐENJEM ZAKONA

Član 36.
(Žalbeno vijeće)

- (1) Žalbeno vijeće vrši poslove drugostepenog organa u rješavanju žalbi o ostvarivanju prava na pristup informacijama i prava na ponovnu upotrebu dokumenata u skladu s ovim zakonom.
- (2) Žalbeno vijeće, kao drugostupanjski organ iz stava (1) ovog člana, predlaže institucijama BiH preduzimanje mjera radi unapređenja ostvarivanja prava na pristup informacijama i ponovnu upotrebu dokumenata propisanu ovim zakonom.
- (3) Žalbeno vijeće inicira donošenje, izmjene i dopune propisa radi provođenja i unapređenja prava na pristup informacijama i ponovnu upotrebu dokumenata.

Član 37.
(Inspeksijski nadzor)

- (1) Inspeksijski nadzor nad provođenjem ovog zakona vrši Ministarstvo pravde putem Upravne inspekcije.
- (2) Inspeksijski nadzor vrši se po zaprimljenoj predstavi podnosioca zahtjeva na pristup informacijama i ponovnu upotrebu dokumenata, na prijedlog treće strane ili po službenoj dužnosti.

(3) Inspektor je samostalan u radu.

(4) Niko ne smije korištenjem službenog položaja ili na drugi način onemogućavati ili ometati inspektora u vršenju nadzora i preduzimanju mjera ili radnji na koje je ovlašten.

Član 38.

(Poslovi inspektora)

(1) U vršenju inspeksijskog nadzora nad primjenom i provođenjem ovog zakona inspektor nadzire:

- a) objavljuje li institucija BiH informacije shodno članu 14. ovog zakona;
- b) osigurava li institucija BiH javnost rada shodno članu 16. stavu (1) tački a) ovog zakona;
- c) je li u instituciji BiH određen službenik za informisanje i postupa li službenik za informisanje u skladu s ovlaštenim propisanim ovim zakonom;
- d) vodi li institucija BiH registar zahtjeva, postupcima i odlukama o ostvarivanju prava na pristup informacijama i ponovnu upotrebu dokumenata;
- e) pravilnost primjene odredaba Zakona po zahtjevu za pristup informacijama i zahtjevima za ponovnu upotrebu dokumenata;
- f) objavljuje li institucija BiH informacije o naknadi troškova za pristup i ponovnu upotrebu dokumenata, kao i uslove za ponovnu upotrebu dokumenata.

(2) U vršenju inspeksijskog nadzora, inspektori imaju pravo zahtijevati i dobiti od institucija BiH sve informacije koje su predmet postupka u skladu s ovim zakonom.

(3) Predmetom inspeksijskog nadzora ne mogu biti informacije iz člana 1. st. (4) i (5) ovog zakona.

Član 39.

(Način rada inspektora)

Inspeksijski nadzor provodi se kao:

- a) neposredni inspeksijski nadzor, direktnim uvidom u podatke i dokumentaciju nadzirane institucije BiH, te uslove i način rada nadzirane institucije BiH;
- b) posredni inspeksijski nadzor, uvidom u dostavljene podatke i dokumentaciju.

Član 40.

(Neposredni inspeksijski nadzor)

(1) Inspektor je dužan o provođenju neposrednog inspeksijskog nadzora obavijestiti rukovodioca institucije BiH u kojem će provoditi neposredni inspeksijski nadzor, najkasnije tri dana prije početka nadzora.

(2) Iznimno od stava (1) ovog člana, inspektor može izvršiti neposredni inspeksijski nadzor bez prethodne najave u slučaju postojanja razloga za hitno postupanje.

(3) Rukovodilac institucije BiH dužan je omogućiti nesmetano provođenje inspeksijskog nadzora, što uključuje osiguranje radnog prostora za provođenje nadzora, korištenje tehničkih pomagala, podataka i dokumentacije koji su predmet nadzora.

(4) Inspektor može po potrebi u okviru provođenja nadzora uzimati izjave rukovodilaca nadziranih institucija BiH ili drugih službenika.

Član 41. **(Posredni inspekcijski nadzor)**

(1) Inspektor u provođenju posrednog inspekcijskog nadzora je ovlašten pisano zatražiti dostavu dokumentacije, te za dostavu iste odrediti rok koji ne može biti duži od 15 dana.

(2) Rukovodilac institucije BiH ili drugo ovlašteno lice dužno je postupiti po traženju inspektora, kao i osigurati dostavu potpunih i tačnih podataka, a u slučaju nemogućnosti postupanja, pisano, bez odgađanja dostaviti očitovanje.

Član 42. **(Zapisnik o inspekcijskom nadzoru)**

(1) Nakon provođenja inspekcijskog nadzora, inspektor sastavlja zapisnik o utvrđenim nezakonitostima, nepravilnostima i nedostacima.

(2) Zapisnik o inspekcijskom nadzoru iz stava (1) ovog člana (u daljem tekstu: Zapisnik) mora sadržavati:

- a) činjenično stanje te eventualne povrede zakona i drugih propisa, nepravilnosti i nedostatke u radu;
- b) ocjenu stanja;
- c) mjere kojima se naređuje otklanjanje utvrđenih nezakonitosti, te rok za izvršenje naređenih mjera;
- d) prijedloge za uklanjanje utvrđenih nepravilnosti i nedostataka u radu;
- e) obavezu izvještavanja inspektora o preduzetim mjerama;
- f) pouku o pravu na žalbu.

(3) Inspektor je dužan, zavisno o prirodi naređenih mjera, odrediti primjeren rok za izvršenje istih.

(4) Ako se prilikom provođenja inspekcijskog nadzora ne utvrde nezakonitosti, nepravilnosti ili nedostaci u radu, o toj činjenici pisano će se obavijestiti rukovodilac institucije BiH.

Član 43. **(Prava i dužnosti inspektora)**

(1) Inspektor zapisnikom može izreći sljedeće mjere:

- a) narediti preduzimanje odgovarajućih mjera radi otklanjanja utvrđenih povreda ovog zakona i propisa donesenih na osnovu ovog zakona, nepravilnosti i nedostataka u radu nadzirane institucije BiH;
- b) zabraniti vršenje radnji koje su preduzimate protivno ovom zakonu;
- c) predložiti preduzimanje mjera u cilju otklanjanja nepravilnosti ili nedostataka u radu;
- d) predložiti preduzimanje mjera s ciljem unapređenja rada nadzirane institucije BiH.

(2) Zapisnik se dostavlja rukovodiocu nadzirane institucije BiH.

(3) Zapisnik se može dostaviti i instituciji BiH kojoj, na osnovu propisa o organizaciji organa uprave na nivou institucija Bosne i Hercegovine, nadzirana institucija BiH neposredno odgovara za rad.

Član 44.

(Kontrola izrečenih mjera iz zapisnika)

(1) Rukovodilac nadzirane institucija BiH dužan je izvršiti izrečene mjere u roku koji je određen zapisnikom.

(2) Rukovodilac nadzirane institucija BiH dužan je u roku od 15 dana računajući od dana isteka roka za preduzimanje zapisnikom izrečenih mjera, inspektoru dostaviti izvještaj i dokaze o izvršenju mjera.

(3) Kontrolu izvršenja izrečenih mjera inspektor vrši u pravilu posredno, pribavljanjem izvještaja i dokaza o provođenju mjera.

(4) Kontrola izvršenja izrečenih mjera može se obaviti i neposrednim kontrolnim inspeksijskim nadzorom, ako to zahtijeva priroda radnji koje se u izvršenju mjera trebaju preduzeti, odnosno kada potrebu neposrednog kontrolnog nadzora, zbog nedostataka u izvještaju utvrdi inspektor.

Član 45.

(Izvještavanje o nepoštivanju izrečenih mjera)

Glavni upravni inspektor je obavezan, u slučaju neizvršenja mjera od strane nadzirane institucije BiH, izrečenih radi uklanjanja nezakonitosti izvjestiti:

- a) Vijeće ministara Bosne i Hercegovine, ako mjere nisu izvršene od strane institucija BiH čiji rukovodilac neposredno odgovara Vijeću ministara Bosne i Hercegovine i
- b) osnivača institucije BiH.

Član 46.

(Postupanje po predstavkama)

(1) Inspektori postupaju po predstavkama na rad institucija BiH u vezi s primjenom ovog zakona.

(2) Inspektor je dužan razmotriti podnesenu predstavku iz stava (1) ovog člana.

(3) Ako u postupku razmatranja predstavke inspektor ocijeni da su navodi izneseni u predavci osnovani, inspektor je ovlašten uputiti upozorenje instituciji BiH na koga se predstavka odnosi radi hitnog preduzimanja aktivnosti na otklanjanju mogućih nezakonitosti, kao i radi dostavljanja izvještaja o preduzetim aktivnostima.

(4) Ako se u postupku po predavci utvrdi da su činjenice izložene u predavci tačne, a otklanjanje nezakonitosti ili nepravilnosti zahtijeva izricanje mjere, inspektor će po službenoj dužnosti provesti inspeksijski nadzor na način i u skladu s ovlaštenjima iz ovog zakona.

(5) Inspektor je dužan obavijestiti podnosioca predstavke o utvrđenim činjenicama, odnosno preduzetim mjerama povodom predstavke.

(6) Obavještenje iz stava (5) ovog člana nije upravni akt.

DIO OSMI - OMBUDSMEN ZA LJUDSKA PRAVA BOSNE I HERCEGOVINE

Član 47.

(Obaveze službenika za informisanje prema Instituciji Ombudsmena za ljudska prava Bosne i Hercegovine)

Službenik za informisanje dužan je instituciji Ombudsmena za ljudska prava Bosne i Hercegovine dostaviti godišnji izvještaj iz člana 17. stava (8) ovog zakona.

Član 48.

(Godišnji izvještaj Institucije Ombudsmena za ljudska prava Bosne i Hercegovine)

Institucija Ombudsmena za ljudska prava radi Godišnji izvještaja o stanju u oblasti slobode pristupa informacijama na nivou institucija Bosne i Hercegovine, koji dostavlja nadležnim institucijama.

DIO DEVETI - PREKRŠAJNE ODREDBE

Član 49.

(Prekršajne odredbe u slučaju napostupanja po rješenju Žalbenog vijeća)

(1) Novčanom kaznom u iznosu od 1.000,00 KM do 10.000,00 KM kaznit će se za prekršaj odgovorno lice u instituciji BiH koje ne postupi u skladu s rješenjem Žalbenog vijeća iz člana 28. stava (10) ovog zakona ili ne postupi u roku koji je određen rješenjem Žalbenog vijeća.

(2) Odgovorno lice iz stava (1) ovog člana može biti kažnjavano više puta, sve dok ne postupi po rješenju Žalbenog vijeća.

Član 50.

(Prekršajne odredbe u slučaju nepostupanja po odredbama ovog Zakona)

(1) Novčanom kaznom od 1.000,00 KM do 10.000,00 KM kaznit će se za prekršaj službeno lice koje ošteti, uništi, sakrije ili na drugi način učini nedostupnim dokument koji sadrži informaciju u namjeri da onemogući ostvarivanje prava na pristup informacijama.

(2) Novačnom kaznom od 1.000,00 KM do 10.000,00 KM kaznit će se fizičko lice, odnosno novčanom kaznom od 2.000,00 KM do 20.000,00 KM kaznit će se pravno lice koje upotrijebi informacije protivno objavljenim uslovima za ponovnu upotrebu dokumenata iz člana 32. ovog zakona.

(3) Novčanom kaznom u iznosu od 500,00 KM do 5.000,00 KM kaznit će se za prekršaj odgovorno lice u instituciji BiH ako:

- a) ne postupi po nalogu upravnog inspektora;
- b) ne omogući upravnom inspektor uvid u informacije koje su predmetom postupka, ne dostavi tražene podatke ili dostavi nepotpune, odnosno netačne podatke;
- c) onemogući inspektor u nesmetano vršenje nadzora;
- d) u zapisnikom određenom roku ne otkloni nezakonitosti, nepravilnosti i nedostatke utvrđene zapisnikom;
- e) ne objavi informacije shodno odredbi člana 14 st. (2) i (3) ovog zakona.

DIO DESETI - PRELAZNE I ZAVRŠNE ODREDBE

Član 51.

(Primjena Zakona o upravnom postupku)

Na sva pitanja kojima se uređuje vođenje postupka, a koja nisu uređena ovim zakonom, na odgovarajući način se primjenjuju odredbe Zakona o upravnom postupku („Službeni glasnik BiH“, br. 29/02, 12/04, 88/07, 93/09, 41/13 i 53/16).

Član 52.

(Prestanak važenja propisa i okončanje pokrenutih postupaka)

- (1) Institucije BiH će osigurati organizacijske, materijalne, tehničke i druge uslove za provođenje odredaba ovog zakona u roku od šest mjeseci računajući od dana stupanja na snagu ovog zakona.
- (2) Stupanjem na snagu ovog zakona prestaje da važi Zakon o slobodi pristupa informacijama u Bosni i Hercegovini („Službeni glasnik BiH“, br. 28/00, 45/06, 102/09, 62/11 i 100/13).
- (3) Postupci pokrenuti do dana stupanja na snagu ovog zakona, okončat će se po propisima koji su bili na snazi u vrijeme pokretanja postupka, ako je to povoljnije za stranku u postupku.
- (4) Svi podzakonski akti doneseni na osnovu Zakona o slobodi pristupa informacijama u Bosni i Hercegovini ostaju na snazi do donošenja novih.

Član 53.

(Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku BiH“.

PSBiH, broj ____/23
____ 2023. godine
Sarajevo

Predsjedavajući
Predstavničkog doma
Parlamentarne skupštine BiH

Predsjedavajući
Doma naroda
Parlamentarne skupštine BiH

O B R A Z L O Ž E N J E

1. USTAVNI OSNOV

Ustavni osnov za donošenje ovog zakona sadržan je u članu IV 4. a) Ustava Bosne i Hercegovine, prema kojem je Parlamentarna skupština Bosne i Hercegovine ovlaštena za donošenje zakona.

2. RAZLOZI ZA DONOŠENJE ZAKONA

Donošenjem Zakona o slobodi pristupa informacijama u Bosni i Hercegovini (u daljem tekstu: Zakon), stavlja se van snage Zakon o slobodi pristupa informacijama u Bosni i Hercegovini („Službeni glasnik BiH“, br. 28/00, 45/06, 102/09, 62/11 i 100/13). Razlozi za donošenje novog zakona su sadržani u potrebi da se ovaj zakon u normativno-pravnom smislu uskladi s Jedinствени pravilima za izradu pravnih propisa u institucijama Bosne i Hercegovine („Službeni glasnik BiH“, br. 11/05, 58/14, 60/14 i 50/17), kojima su uređeni formalni kriteriji za izradu pravnih propisa u skladu s odgovarajućom praksom Evropske unije. Ovim zakonom smo pokušali da slobodu pristupa informacijama propišemo na sveobuhvatan način, koristeći terminologiju na jasan, dosljedan i precizan način.

Donošenjem ovog zakona žele se prevazići uočeni nedostaci, proizišli iz praktične primjene Zakona o slobodi pristupa informacijama na nivou institucija Bosne i Hercegovine.

Razlog za donošenje novog zakona, ogleda se i u značaju materije koja je predmetom definisanja ovog zakona. Naime, sloboda pristupa informacijama smatra se jednim od predušlova odgovornog i transparentnog rada organa javne vlasti. Ovim zakonom propisan je poseban institut tj. „proaktivan pristup informacijama“, obzirom da se demokratizacijom uvida u podatke od javnog značaja kojima raspolažu institucije Bosne i Hercegovine doprinosi jačanju povjerenja u organe javne vlasti.

Proaktivan pristup informacijama je proces od kojeg zavisi javnost rada javnog organa, te istovremeno upoznavanje javnosti s relevantnim informacijama od ključne važnosti za razumijevanje rada javnih organa.

Razlozi za donošenje ovog zakona sadržani su i u:

- obavezi Bosne i Hercegovine u ispunjavanju međunarodno preuzetih obaveza. Potpisivanjem Sporazuma o stabilizaciji i pridruživanju između Evropskih zajednica i njihovih država članica, s jedne strane i Bosne i Hercegovine s druge strane („Službeni glasnik BiH – Međunarodni ugovori“, br. 10/08, 1/17 i 8/17) 16. 6. 2008. BiH je preuzela obavezu usklađivanja svog postojećeg i budućeg zakonodavstva i njegovu propisnu primjenu i provođenje od dana potpisivanja Sporazuma do kraja prelaznog perioda od šest godina od dana stupanja na snagu. Sporazum je stupio na snagu 1. 6. 2015. te je kraj prelaznog perioda 1. 6. 2021. U konkretnom slučaju Nacrt zakona se usklađuje s odredbama Direktive (EU) 2019/1024 Evropskog parlamenta i Vijeća od 20. juna 2019. godine o otvorenim podacima i ponovnoj upotrebi dokumenata javnog sektora;

- bržoj implementaciji Inicijative za otvorenu vlast, kojoj je Bosna i Hercegovina pristupila 2014. godine, kojom se takođe ističe potreba definisanja pojmova: ponovna upotreba dokumenata, otvoreni oblik informacije, test javnog interesa i proaktivna transparentnost;

- skraćivanje rokova za dostavljanje traženih podataka i

- uspostavljanje Centralnog portala institucija Bosne i Hercegovine, kao javno dostupnog alata na internetu, koji korisnicima omogućava trajni pristup informacijama pohranjenim u bazi elektronskih dokumenata i/ili fizičkim zbirkama dokumenata, kojim bi bilo omogućeno svim zainteresiranim licima neposredan uvid u informacije s kojima raspolaže institucija Bosne i Hercegovine, a što bi posebno uticalo na transparentnost rada.

Bitno je istaknuti da je u Analitičkom izvještaju uz Mišljenje Evropske komisije o zahtjevu Bosne i Hercegovine za članstvo u Evropskoj uniji istaknuto da „zakonodavstvo o slobodi pristupa informacijama na državnoj i entitetskim nivoima treba uskladiti u cijeloj zemlji i s međunarodnim i evropskim standardima“.